



Broj: 01-50-1-54-58/05.
Sarajevo, 08. juna 2005.

ZAPISNIK

58. sjednice Predstavničkog doma
Parlamentarne skupštine Bosne i Hercegovine,
održane 08. juna 2005. godine

Pedeset osma sjednica počela je 10,10 sati. Prisustvovalo je 39 poslanika (Milorad Živković na sjednicu je stigao sa zakašnjenjem, po povratku sa službenog puta). Opravdano su odsustvovali: Abdulah Nakaš, Azra Hadžiahmetović i Elmir Jahić.

Iz Vijeća ministara BiH sjednici su prisustvovali: predsjedavajući Adnan Terzić, ministri Bariša Čolak, Safet Halilović i Ljerka Marić, te zamjenici ministara Zoran Tešanović, Haris Bašić, Dragan Mektić i Jusuf Kumalić. Sjednici su prisustvovali predstavnici Izborne komisije BiH i Visokog sudskog i tužilačkog vijeća, zbog razmatranja njihovih izvještaja.

Iz međunarodnih organizacija sjednicu su pratili: Sanja Stevanović Jelena Despot – OHR, Daniela Mićanović – Evropska komisija i Olivier Schirmann – francuska ambasada.

Prisustvovali su i predstavnici Centra civilnih inicijativa Ivica Čavar i Jasmila Pašić.

Prije prelaska na raspravu o prijedlogu dnevnog reda, predsjedavajući Šefik Džaferović upoznao je poslanike o tome da je Izborna komisija BiH mandat poslanika, umjesto Ive Mire Jovića, dodijelila Vlatki Komšić, sljedećem kvalifikovanom kandidatu sa liste HDZ-Demokršćani, pa je novog poslanika pozvao da pred Domom da svečanu izjavu.

Vlatka Komšić dala je svečanu izjavu i time preuzela poslanička prava i obaveze.

Poslije davanja svečane izjave, predsjedavajući Doma Šefik Džaferović dao je uvodne napomene o prijedlogu dnevnog reda i upoznao poslanike o izmjenama i dopunama dnevnog reda predloženog u pozivu za sjednicu. Napomenuo je da su poslanici na klupe dobili izmijenjeni i dopunjeni dnevni red koji je usaglašen na sjednici Proširenog kolegija. Zatim je poslanike upoznao da je Kolegij od predsjedavajućeg Vijeća ministara BiH dobio zahtjev za urštavanjem u dnevni red tačke - Informacija predsjedavajućeg Vijeća ministara BiH o situaciji u BiH - o čemu se usaglasio uži Kolegij, ali na Proširenom kolegiju nije bilo saglasnosti. Kazao je da je o tome obavijestio predsjedavajućeg Vijeća ministara BiH, na šta mu predsjedavajući Vijeća ministara odgovorio da nema potrebe za podnošenjem informacije, ukoliko Prošireni kolegij s tim nije saglasan. Iz tog razloga ni on neće predlagati da se Dom izjasni o uvrštavanju ove tačke.

Reagovao je prvi zamjenik predsjedavajućeg Doma **Nikola Špirić**. Uz ostalo, rekao je da misli da bi Parlamentarna skupština BiH, i da nije bilo inicijative predsjedavajućeg Vijeća ministara BiH, trebao tražiti da mu se podnese informacija o novonastaloj situaciji. Zato misli da u dnevni red treba uvrstiti informaciju predsjedavajućeg Vijeća ministara BiH, pa je predložio da se Dom o tome izjasni.

Momčilo Novaković objasnio je da on na Proširenom kolegiju nije bio protiv uvrštavanju u dnevni red tačke - Informacija predsjedavajućeg Vijeća ministara BiH - već je bio protiv da se ona tretira kao obavezna tačka, s obzirom da se ne radi o informaciji Vijeća ministara. Dao je prigovor

na traženje predsjedavajućeg Vijeća ministara BiH da podnese informaciju o stanju u Bosni i Hercegovini, za šta on, kako je rekao, nema kapacitet. Zato bi bilo logičnije da je tražio da upozna Dom o funkcioniranju Vijeća ministara BiH, odnosno izvršne vlasti.

Predsjedavajući **Džaferović** odgovorio je da Kolegij prihvata da se naziv tačke preformuliše i glasi - Informacija predsjedavajućeg Vijeća ministara BiH o stanju u Vijeću ministara BiH - i smatra da to treba uvrstiti u dnevni red.

Zlatko Lagumdžija, uz ostalo, pozdravio je inicijativu predsjedavajućeg Vijeća ministara BiH da se obrati Domu u ovakvoj, kako je rekao, delikatnoj političkoj situaciji. Rekao je da on ima prijedlog da se u dnevni red uvrsti i Inicijativa za izmjene Izbornog zakona BiH, kako bi se definirala procedura za organiziranje prijevremenih izbora. Ukoliko to ne bude prihvaćeno, predložio je da se, u okviru rasprave o Informaciji predsjedavajućeg Vijeća ministara BiH, usvoji zaključak kojim će se Vijeće ministara obavezati da u roku od pet do sedam dana dostavi odgovarajuće zakonske prijedloge kojim će se definirati procedura prijevremenih izbora.

Martin Raguž podržao je prijedlog da predsjedavajući Vijeća ministara podnese informaciju. Što se tiče prijedloga Zlatka Lagumdžije, podsjetio je da je osnovana Zajednička komisija Parlamentarne skupštine BiH i Vijeća ministara BiH, koja zajedno s Izbornom komisijom BiH radi na pripremi izmjena i dopuna Izbornog zakona Bosne i Hercegovine, pa sve inicijative treba usmjeriti ka toj komisiji.

U raspravi o dnevnom redu učestvovali su i: Beriz Belkić, Seada Palavrić, Vinko Zorić, Tihomir Gligorić, Filip Andrić, Petar Kunić, Mladen Potočnik i Sead Avdić.

Filip Andrić predložio je da se sa dnevnog reda skine zahtjev Momčila Novakovića za razmatranje Prijedloga zakona o visokom obrazovanju, prema članu 104. Poslovnika.

Poslije rasprave, predsjedavajući je dao na glasanje prvo prijedlog Kolegija da se u dnevni red, kao tačka 2., uvrsti - Informacija predsjedavajućeg Vijeća ministara BiH o stanju u Vijeću ministara BiH.

Prijedlog je usvojen, s 30 glasova «za» i 4 «uzdržana».

Sljedeći prijedlog o kojem se Dom izjasnio jeste prijedlog Zlatka Lagumdžije da se u dnevni red uvrsti tačka - Inicijativa za izmjenu i dopunu Izbornog zakona BiH - kojom bi se definirala procedura za organiziranje prijevremenih izbora.

Prijedlog nije usvojen. «Za» je glasalo 14, «protiv» 18 i «uzdržana» četiri poslanika.

U vezi s prijedlogom Filipa Andrića, predsjedavajući Džaferović rekao je da je to obavezna tačka jer se radi o izjašnjavanju o proceduri. Zatim je konstatovao da 58. sjednica ima sljedeći

D N E V N I R E D

1. Zapisnik 57. sjednice Predstavničkog doma PSBiH;
2. Informacija predsjedavajućeg Vijeća ministara BiH o stanju u Vijeću ministara BiH;
3. Poslanička pitanja i odgovori;
4. Zahtjev Komisije za vanjsku trgovinu i carine za razmatranje Prijedloga zakona o izmjeni Zakona o carinskoj tarifi Bosne i Hercegovine po hitnom postupku, u skladu sa članom 105. Poslovnika;
5. Zahtjev poslanika Momčila Novakovića za razmatranje Prijedloga okvirnog zakona o visokom obrazovanju Bosne i Hercegovine po hitnom postupku, u skladu sa članom 104. Poslovnika;
6. Zahtjev poslanika Momčila Novakovića za razmatranje Zakona o izmjenama i dopunama Zakona o nadzoru i kontroli prelaska državne granice po hitnom postupku, u skladu sa članom 105. Poslovnika;
7. Zahtjev Vijeća ministara za razmatranje Prijedloga zakona o izmjenama i dopunama Zakona o krivičnom postupku BiH po hitnom postupku, u skladu sa članom 105. Poslovnika;
8. Prijedlog zakona o željeznicama Bosne i Hercegovine (prvo čitanje);

9. Prijedlog zakona o izmjenama i dopunama Zakona o zaštiti prava pripadnika nacionalnih manjina u Bosni i Hercegovini – predlažaći: poslanici Martin Raguž, Mirsad Ćeman i Selim Bešliagić (prvo čitanje);
10. Godišnji izvještaj Visokog sudskog i tužilačkog Vijeća Bosne i Hercegovine za 2004. godinu;
11. Informacija o stanju sigurnosti Bosne i Hercegovine u 2004. godini;
12. Informacija o stanju vanjske zaduženosti Bosne i Hercegovine sa 31.12.2004. godine;
13. Prijedlog zaključka Komisije za ljudska prava, imigraciju, izbjeglice i azil o rezultatima rješavanja predstavke Udruženja decertificiranih policajaca Federacije BiH i Udruženja decertificiranih policajaca Republike Srpske;
14. Inicijativa Kluba poslanika SDP-a za osnivanje odbora/komisije za usvajanje teksta državne himne Bosne i Hercegovine;
15. Imenovanje tri člana u zajedničke komisije radi postizanja sporazuma o istovjetnom tekstu
 - a) Zakona o konkurenciji,
 - b) Zakona o izmjenama i dopunama Zakona o državnoj službi u institucijama Bosne i Hercegovine;
16. Davanje saglasnosti za ratifikaciju:
 - a) Sporazuma između visokog predstavnika za BiH i Bosne i Hercegovine o uspostavljanju Ured registrara Odsjeka I za ratne zločine i Odsjeka II za organizirani kriminal, privredni kriminal i korupciju Krivičnog i Apelacionog odjeljenja Suda BiH, kao i Posebnog odjeljenja za ratne zločine i Posebnog odjeljenja za organizirani kriminal, privredni kriminal i korupciju Tužilaštva BiH,
 - b) Ugovora o zajmu (Regionalni program razvoja puteva) između Bosne i Hercegovine i Evropske banke za obnovu i razvoj,
 - c) Nota sporazuma između guvernera Centralne banke Libije i ministra za međunarodnu saradnju Bosne i Hercegovine,
 - d) Protokola između Vijeća ministara BiH i Vlade Republike Turske o međusobnoj zamjeni nekretnina – zemljišta za izgradnju diplomatskih predstavništava u Sarajevu i Ankari,
 - e) Ugovora između Bosne i Hercegovine i Republike Hrvatske o zajedničkim lokacijama na graničnim prijelazima,
 - f) Aneksa II Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Doljani – Metković,
 - g) Aneksa III Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Neum I – Klek,
 - h) Aneksa IV Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Neum II – Zaton Doli,
 - i) Aneksa V Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Velika Kladuša – Maljevac,
 - j) Aneksa VI Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Izačić-Ličko Petrovo Selo,
 - k) Aneksa Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Bosanska-Srpska Kostajnica – Hrvatska Kostajnica;
17. Imenovanja i razrješenja članova komisija Doma;
18. Prijedlog zaključka o proceduri za imenovanje tri člana Izborne komisije BiH.

O Zapisniku nije bilo rasprave. Usvojen je jednoglasno.

Ad. – 2: Informacija predsjedavajućeg Vijeća ministara BiH o stanju u Vijeću ministara BiH

Predsjedavajući Vijeća ministara **Adnan Terzić** usmeno je podnio Domu informaciju. Uz ostalo, rekao je da je juče donio odluku i prihvatio ostavku Mladena Ivanića od 18.12.2004. godine, a koju nikad nije povukao. Kao razlog za donošenje odluke naveo je Ivanićevo ponašanje u vezi s pitanjem izbor direktora, zamjenika i pomoćnika direktora SIPA-e, čime je narušen osnovni politički princip kojeg se on, kao predsjedavajući Vijeća ministara BiH, držao dvije i po godine i kojeg se ovo vijeće ministara, s manje ili više problema, uspijevalo držati. «A to je da, dok imamo svoje mandate, visoki predstavnik ne donosi za nas odluke. Mislim da je to ključni princip kojim treba da se vode svi političari u Bosni i Hercegovini koji prihvate da obavljaju izvršnu funkciju.» Uz ostalo, podsjetio je poslanike na politički dogovor o rapsoredu tri bitne funkcije u Minsitarstvu odbrane, OSA-i i SIPA-i i o provedenoj proceduri za izbor direktora SIPA-e, kao i o funkcioniranju Vijeća ministara BiH poslije situacije nastale nakon odluka visokog predstavnika o smjeni određenih kadrova u Republici Srpskoj i ostavke Mladena Ivanića.

Nakon izlaganja predsjedavajućeg Vijeća ministara BiH, vođena je duža rasprava u kojoj su učestvovali: Mladen Potočnik, Tihomir Gligorić, Jelina Đurković, Muhamed Moranjković, Ivo Lozančić, Sead Avdić, Vinko Zorić, Zlatko Lagumdžija, Petar Kunić, Nikola Špirić, Filip Andrić, Dušanka Majkić, Momčilo Novaković, Adnan Terzić, Martin Raguć, Beriz Belkić i Jozo Križanović.

Nakon rasprave predsjedavajući je sumirao prijedloge zaključaka iznesene raspravi - dijelom u pisanoj formi, a dijelom usmeno. Rekao je da su prijedloge zaključaka dali: Zlatko Lagumdžija, Petar Kunić, Beriz Belkić, Jozo Križanović i Jelina Đurković. Zatim je dao pauzu od sat vremena i zamolio klubove da obave konsultacije o prijedlozima zaključaka.

Poslije pauze, predsjedavajući je rekao da on, kao predsjedavajući Doma, a na osnovu prijedloga Beriza Belkića i još jednog broja prijedloga, najboljim rješenjem smatra usvajanje zaključka: Dom informaciju predsjedavajućeg Vijeća ministara prima k znanju i predsjedavajućeg zadužuje da obavi konsultacije s političkim strankama koje su zastupljene u Domu radi prevazilaženja postojećeg stanja u Vijeću ministara BiH.

O prijedlogu zaključka diskutovali su: Tihomir Gligorić, Zlatko Lagumdžija, Momčilo Novaković, Jozo Križanović, Sead Avdić, Nikola Špirić, Nijaz Duraković, Zlatko Lagumdžija, Jelina Đurković i Adnan Terzić.

Dom je usvojio prijedlog zaključka koji je preložio Beriz Belkić, a glasi:

«Predstavnički dom zahtijeva od predsjedavajućeg Vijeća ministara BiH da obavi konsultacije s političkim strankama iz Predstavničkog doma Parlamenarne skupštine BiH radi prevazilaženja postojeće situacije u Vijeću ministara BiH.»

Zatim je predsjedavajući dao na glasanje prijedloge zaključaka Zlatka Lagumdžije:

1. Predstavnički dom poziva predsjedavajućeg Vijeća ministara BiH da podnese ostavku.

Prijedlog nije usvojen. «Za» je glasalo 15, «protiv» 17 i «uzdržano» pet poslanika.

2. «Zadužuje se Vijeće ministara BiH da u roku od sedam dana pripremi izmjene i dopune Izbornog zakona BiH kojim bi se definirala procedura za oraganiziranje prijevremenih izbora.»

Ni ovaj prijedlog zaključka nije usvojen. «Za» je glasalo sedam, «protiv» 22, «uzdržano» osam poslanika.

U daljnjoj raspravi **Petar Kunić** izmijenio je svoj prijedlog zaključka, tako da glasi: **«Poništava se odluka predsjedavajućeg Vijeća ministara BiH o imenovanju v.d. ministra».**

«Za» je glasalo 15, «protiv» 14 i «uzdržano» pet poslanika – po entitetima: iz Federacije BiH «za» su glasala tri, iz Republike Srpske 13. Prema tome, prijedlog zaključka nije dobio entitetsku većinu, pa će se naknadno (zbog momentalnog odsustva jednog člana Kolegija) provesti postupak usaglašavanja u Kolegiju kao Komisiji.

Predsjedavajući je na glasanje dao još dva prijedloga zaključka koje je podnio Jozo Križanović.

Prvi prijedlog zaključka je usvojen, a glasi:

«Predstavnički dom Parlamentarne skupštine BiH izražava zabrinutost zbog općeg stanja u zemlji i krize u Vijeću ministara BiH, izazvanih prihvaćenim i najavljenim ostavkama ministara.»

«Za» ovaj prijedlog glasalo je 17, «protiv» 16 i «uzdržano» dva poslanika (iz Federacije «za» 10, iz Republike Srpske sedam).

Drugi prijedlog zaključka Joze Križanovića nije usvojen, a glasi: **«Ukoliko Predstavnički dom ukazuje povjerenje predsjedavajućem Vijeća ministara BiH, obavezuje se predsjedavajući Vijeća ministara da, u saradnji sa ovim domom, u roku od sedam dana kompletira Vijeće ministara BiH.»**

«Za» prijedlog je glasalo 11, «protiv» 16 i «uzdržano» devet poslanika.

Prema tome, u vezi s informacijom predsjedavajućeg Vijeća ministara BiH o stanju u Vijeću ministara BiH, Predstavnički dom usvojio je sljedeći zaključak:

1. Predstavnički dom Parlamentarne skupštine BiH izražava zabrinutost zbog općeg stanja u zemlji i krize u Vijeću ministara BiH, izazvanih prihvaćenim i najavljenim ostavkama ministara.

2. Predstavnički dom zahtijeva od predsjedavajućeg Vijeća ministara BiH da obavi konsultacije s političkim strankama iz Predstavničkog doma Parlamentarne skupštine BiH radi prevazilaženja postojeće situacije u Vijeću ministara.

Ad – 3: Poslanička pitanja i odgovori

Predsjedavajući Šefik Džaferović konstatovao je da su za ovu sjednicu odgovore na pitanja dobili: Momčilo Novaković, Muhamed Moranjkić, Tihomir Gligorić, Ljiljana Milićević, Seada Palavrić, Ivo Lozančić, Milorad Živković, Petar Kunić, Mirsad Čeman i Vinko Zorić.

Odgovore na pitanja komentarisali su: Milorad Živković, Seada Palavrić, Muhamed Moranjkić, Momčilo Novaković, Mirasad Čeman i Tihomir Gligorić.

Postavljena su nova poslanička pitanja kako slijedi:

Sead Avdić:

«S obzirom da je ostalo još samo mjesec dana do obilježavanja 10. godina od stravičnih zločina u Srebrenici nad bošnjačkim narodom, predlažem i tražim od Kolegija da, zajedno s klubovima poslanika, organizira izradu zajedničke rezolucije o srebreničkoj tragediji i održi tematsku sjednicu koja bi imala za cilj razmatranje i usvajanje ove rezolucije. Smatramo da je to minimum odgovornosti, moralne i političke, spram srebreničke tragedije i stradanja nevinih civila.»

Filip Andrić:

«Potaknut informacijom iz medija o premlaćivanju zatvorenika hrvatske i srpske nacionalnosti u zatvoru u Zenici, tražim od Komisije da žurno posjeti zatvor i sagleda stanje u tom zatvoru, s aspekta poštivanja ljudskih prava zatvorenika, te predloži odgovarajuće mjere s ciljem potpunog poštivanja Evropske konvencije o zaštiti ljudskih prava.»

Jelina Đurković:

«Da li je tačno da je imenovani vršilac dužnosti ministra inostranih poslova trenutno vršilac dužnosti sekretara u MIP-u?»

Dužanka Majkić:

«Šta je do sada urađeno na implementaciji Zakona o veterinarstvu, s posebnim osvrtom na sljedeće:

1. U kojoj je trenutno fazi i kada će biti završeno obilježavanje životinja u BiH?
2. Da li je tačno da su prošle godine kod uvezenih goveda u BiH uočena dva slučaja bolesti kravljeg ludila?
3. Šta je Ured za veterinarstvo odgovorio predstavnicima EU u vezi s tim slučajem?»

Beriz Belkić:

«Šta je Tužilaštvo BiH poduzelo i šta će poduzeti u vezi s, po mom mišljenju, protivustavnim radnjama koje ugrožavaju suverenitet i teritorijalni integritet Bosne i Hercegovine. Mislim na prikupljanje potpisa za referendum o otcjepljenju Republike Srpske, koje javno u Republici Srpskoj prikupljaju neke nevladine organizacije.»

Mladen Potočnik:

«Tražim od Vijeća ministara BiH da pokrene postupak utvrđivanja odgovornosti državnih službenika u slučaju tzv. Alžirska grupa. Slijedom događaja, ustanovili smo da je tu načinjen niz prekršaja. Zato tražim od Parlamentarne skupštine BiH i Vijeća ministara BiH:

1. da se napravi revizija svih državljanstava od 1992. pa dalje;
2. da se tačno provjeri ko je oduzeo državljanstvo građanima, bez obzira što su ta državljanstva dobili, rekao bih, '95. i '97. godine;
3. zaštitu državljana BiH i nedržavljana koji su prijavljeni u Bosni i Hercegovini, kao i odgovornost države Bosne i Hercegovine prema članovima državljana BiH. Znači, radi se o odnosu države Bosne i Hercegovine prema svojim državljanima.
4. izvršenje obećane i neizvršene obaveze države prema članovima porodice oštećenih.»

Selim Bešlić:

1. «Zašto u posljednjih pet mjeseci nije osnovana Kordinaciona komisija za pitanja mladih, na osnovu Odluke Vijeća ministara BiH, i kada će ona početi s radom?

2. Kada će se provesti reorganizacija Ministarstva civilnih poslova unutar kojeg će biti osnovan Odsjek za mlade, na osnovu zvanične informacije ovog Ministarstva, obznanjene u proljeće 2005. godine na nekoliko javnih skupova?»

Seada Palavrić:

1. «Tokom proteklog vikenda vidjeli smo potresne snimke genocida nad Bošnjacima u Srebrenici, od kojih su četiri maloljetnika. Zločin je, izgleda, izvršila specijalna jedinica MUP-a Srbije.

Danas je na Brionima u toku pokušaj potpisivanja Deklaracije o pravosudnoj saradnji, prema kojoj bi DZSCG, RH i BiH bezuvjetno izručivale optužene za ratne zločine (osobe s dvojnim državljanstvom) državi u kojoj je zločin počinjen. Smatram da svako ko ne učini sve kako bi omogućio da osobe optužene za kršenje međunarodnog humanitarnog prava ne izmaknu pravdi, skrivajući se iza dvojnog državljanstva, htio to ili ne, postaje saučesnik u nekažnjavanju zločina.

Imajući u vidu izneseno i činjenicu da RM i DZSCG, pozivajući se na svoje ustave, odbijaju potpisati ovu deklaraciju, pozivam Evropsku komisiju EU da ovim dvjema zemljama, sve dok ne potpišu ovu deklaraciju, ne dopuste početak pregovora o daljnjem približavanju Evropskoj uniji, jer se države članice EU moraju odreći dijela svoga suvereniteta u korist EU.

2. Postavljam pitanje MVP, SIPA i Tužiteljstvu BiH – šta znaju o putu i izjavama ministra unutrašnjih poslova RS u SAD-u, s aspekta ugleda i ustavnog poretka BiH? Isto vrijedi i za izjave D. Andana.»

Momčilo Novaković:

«Novoizabrana lektorica za srpski jezik je izabrana na to radno mjesto i pored niza nelogičnosti:

- upitnik je popunjen latiničnim pismom;

- novoizabrana lektorica na popisu se izjasnila kao 'ostali';
- na vratima ureda je natpis na latiničnom pismu.

Iz navedenog se može zaključiti da joj ćirilica nije jača strana, što me dovodi u dilemu o njenoj sposobnosti da uspješno obavlja posao. Moja pitanja glase:

1. Ko je izvršio bodovanje kandidata, na osnovu kojih kriterija su kandidati dobijali bodove i koliko je bodova dobio svaki kandidat pojedinačno po kriterijima? Tražim zapisnik bodovanja.
2. Na kojem jeziku je novoizabrana lektorica za srpski jezik lektorisala tekstove dok je bila zaposlena na TVBiH.
3. Na koji jezik je prevodila novoizabrana lektorica za srpski jezik dok je bila zaposlena u SFOR-ovoj bazi u Butmiru?
4. Na kojem jeziku su bili tekstovi koje je lektorisala novoizabrana lektorica za srpski jezik dok je bila zaposlena u Centru za promociju civilnog društva?»

Mirsad Ćeman:

«1. Zbog čega se zainteresiranim građanima, pa i institucijama, čak ni za naučnoistraživački rad – bar ne u potrebnoj mjeri - ne dozvoljava uvid u arhivsku građu, vezanu za period 1948-1956. (dokumenti vezani za INFORMBIRO), bez obzira da li su vezani za UDB-u, sudove, tužilaštva i sl. U tom kontekstu – da li je Zakon o Obavještajno-sigurnosnoj agenciji BiH, posebno član 87., smetnja za odobravanje uvida u «lične dosjee».

Da li je opravdano i koje je obrazloženje za nestavljanje na uvid, posebno naučnoj javnosti, kompletne arhivske građe vezane za INFORMBIRO (period 1948-1956), NDH (period 1941-1945) te period 1945-1947, vezan za aktivnost organa vlasti (DPZ, KPJ, NOF, UDB i dr.). Kako se, posebno naučna javnost, sve više zanima za ovu građu, a nema uvijek razumijevanja (npr. od nadležnih u OSA-i), da li se u Ministarstvu sigurnosti BiH razmišlja o prijedlozima za izmjene propisa koji ne omogućavaju uvid u tu građu, pa i lične dosjee.

Ako je odgovor NE, pored razumijevanja ovog upita kao «poslaničkog pitanja», sugerišem njegovo uzimanje u obzir i kao «inicijativu» za preispitivanje rješenja u važećim propisima.

2. Kada će se zaštititi interesi građana Janje u pograničnom području sa Srbijom i Crnom Gorom.»

Ljiljana Milićević:

«Šta će učiniti Ministarstvo sigurnosti i nadležne agencije o pitanju javno iznesenih tvrdnji ljudi koji su dobro informirani da se u Bosni i Hercegovini «privatno» tajno skupljaju informacije o nekim ljudima, mimo legalnih institucija.»

Ad. – 4: Zahtjev Komisije za vanjsku trgovinu i carine za razmatranje Prijedloga zakona o izmjeni Zakona o carinskoj tarifi Bosne i Hercegovine po hitnom postupku, u skladu sa članom 105. Poslovnika

O ovoj tački diskutovali su: Dušanka Majkić, Beriz Belkić i Jozo Križanović.

Dom je, s 20 glasova «za», dva «protiv» i jednim «uzdržan», usvojio zahtjev za hitni postupak. Zatim je, s 23 glasa «za» i jednim «protiv», usvojen Zakon o izmjeni Zakona o carinskoj tarifi Bosne i Hercegovine.

Na prijedlog Joze Križanovića, Dom je usvojio **zaključak kojim se poziva Vijeće ministara BiH da temeljitije sagleda oblast carinskih tarifa i da se sačine cjelovite izmjene i dopune, kako se ne bi ovako često podnosile izmjene.**

Ovaj zaključak usvojen je jednoglasno (u momentu glasanja prisutno 26 poslanika).

Ad. – 5: Zahtjev poslanika Momčila Novakovića za razmatranje Prijedloga okvirnog zakona o visokom obrazovanju Bosne i Hercegovine po hitnom postupku, u skladu sa članom 104. Poslovnika

O ovoj tački diskutovali su Filip Andrić i Momčilo Novaković, a nakon rasprave, glasalo se o zahtjevu.

«Za» zahtjev je glasalo 10 i «protiv» 17 poslanika.

Predsjedavajući je konstatovao da zahtjev za hitni postupak nije usvojen, pa će se predloženi zakon razmatrati u redovnoj proceduri.

Ad. – 6: Zahtjev poslanika Momčila Novakovića za razmatranje Zakona o izmjenama i dopunama Zakona o nadzoru i kontroli prelaska državne granice po hitnom postupku, u skladu sa članom 105. Poslovnika

Momčilo Novaković obrazložio je potrebu za donošenje ovog zakona i zahtjev za hitni postupak.

U raspravi su učestvovali Beriz Belkić i Seada Palavrić.

Zahtjev za hitni postupak nije dobio entitetsku većinu. «Za» je glasalo 14, «protiv» 13 i «uzdržano» dva poslanika – iz Federacije: «za» je glasalo šest, iz Republike Srpske osam poslanika.

Predsjedavajući je konstatovao da zahtjev za hitni postupak ide na usaglašavanje u Komisiji Kolegija.

Ad. - 7: Zahtjev Vijeća ministara BiH za razmatranje Prijedloga zakona o izmjenama i dopunam Zakona o krivičnom postupku BiH po hitnom postupku, u skladu sa članom 105. Poslovnika

Poslije uvodnih napomena predsjedavajućeg, kratko je diskutovao Mirsad Ćeman. Zatim je Dom prvo usvojio zahtjev za hitni postupak («za» 23, «protiv» jedan i «uzdržano» tri), nakon čega je usvojio i Zakon o izmjenama i dopunama Zakona o krivičnom postupku jednoglasno, s 27 glasova.

Ad. – 8: Prijedlog zakona o željeznicama Bosne i Hercegovine (prvo čitanje)

O ovom prijedlogu zakona nije bilo rasprave.

Dom je jednoglasno usvojio Prijedlog zakona u prvom čitanju, a zatim i prijedlog da se pređe u drugo čitanje.

Također jednoglasno (prisutno 28 poslanika), usvojen je Zakon o željeznicama Bosne i Hercegovine.

Ad. – 9: Prijedlog zakona o izmjenama i dopunama Zakona o zaštiti prava pripadnika nacionalnih manjina u BiH – predlagači: poslanici Martin Raguž, Mirsad Ćeman i Selim Bešlić (prvo čitanje)

U ime nadležne komisije, kratko je govorio Tihomir Gligorić. U vezi s Izvještajem komisije, Seada Palavrić pitala je kako se pojavljuje termin «privremeni predsjedavajući Komisije», jer Poslovnik ne poznaje takav termin, već «predsjedavajući i zamjenici predsjedavajućeg».

Predsjedavajuć joj je odgovorip da je to vjerovatno greška, jer Komisija za ljudska prava ima predsjedavajućeg i njegove zamjenike. Zatim je Prijedlog zakona dao na glasanje u prvom čitanju.

Prijedlog zakona usvojen je jednoglasno u pravom čitanju, a zatim, s 26 glasova «za» i jednim «uzdržanim», usvojio i prijedlog predsjedavajućeg da se pređe u drugo čitanje.

U drugom čitanju nije bilo rasprave.

S 26 glasova «za» i jednim «uzdržan», usvojen je Zakon o izmjenama i dopunama Zakona o zaštiti prava pripadnika nacionalnih manjina u BiH.

Ad. - 10: Godišnji izvještaj Visokog sudskog i tužilačkog vijeća Bosne i Hercegovine za 2004. godinu

O Izvještaju diskutovali su: Beriz Belkić, Tihomir Gligorić, Petar Kunić, Muhamed Moranjkić, Hazim Felić, Seada Palavrić, Jelina Đurković, Ljiljana Milićević i Filip Andić.

O raspravi govorio je predsjednik Visokog sudskog i tužilačkog vijeća – Ranko Perić.

Nakon rasprave, predsjedavajući je predložio da Dom usvoji zaključak kojim se usvaja Godišnji izvještaj Visokog sudskog i tužilačkog vijeća BiH za 2004. godinu, s Izvještajem i zaključcima nadležne komisije, te da se transkript rasprave dostavi Visokom sudskom i tužilačkom Vijeću.

«Za» ovaj zaključak glasalo je 29, «protiv» jedan i «uzdržano» dva poslanika.

Ad. od 11. do 14.

S obzirom na dužinu trajanja sjednice, predsjedavajući je predložio da se ove četiri tačke odgode za narednu sjednicu Doma, s obzirom da se radi o materijalima koji zahtijevaju širu raspravu.

Prijedlog predsjedavajućeg usvojen je jednoglasno.

Ad. – 15: Imenovanje tri člana u zajedničke komisije radi postizanja sporazuma o istovjetnom tekstu

a) Zakona o konukrenciji,

b) Zakona o izmjenama i dopunama Zakona o državnoj službi u institucijama BiH

U zajedničke komisije oba doma imenovani su:

a) Hazim Felić, Filip Andrić i Tihomir Gligorić i

b) Nenad Mišić, Vinko Zorić i Nadžida Mlaćo.

Ad – 16: Davanje saglasnosti za ratifikaciju:

- a) Sporazuma između visokog predstavnika za BiH i Bosne i Hercegovine o uspostavljanju Ureda registrara Odsjeka I za ratne zločine i Odsjeka II za organizirani kriminal, privredni kriminal i korupciju Krivičnog i Apelacionog odjeljenja Suda BiH, kao i Posebnog odjeljenja za ratne zločine i Posebnog odjeljenja za organizirani kriminal, privredni kriminal i korupciju Tužilaštva BiH,
- b) Ugovora o zajmu (Regionalni program razvoja puteva) između Bosne i Hercegovine i Evropske banke za obnovu i razvoj,
- c) Nota sporazuma između guvernera Centralne banke Libije i ministra za međunarodnu saradnju BiH,
- d) Protokola između Vijeća ministara BIH i Vlade Republike Turske o međusobnoj zamjeni nekretnina – zemljišta za izgradnju diplomatskih predstavništava u Sarajevu i Ankari,
- e) Ugovora između Bosne i Hercegovine i Republike Hrvatske o zajedničkim lokacijama na graničnim prijelazima,
- f) Aneksa II Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Doljani – Metković,
- g) Aneksa III Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Neum I – Klek,
- h) Aneksa IV Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Neum II – Zaton Doli,
- i) Aneksa V Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Velika Kladuša – Maljevac,

- j) Aneksa VI Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Izačić-Ličko Petrovo Selo,
- k) Aneksa Ugovora između Bosne i Hercegovine i Republike Hrvatske o zajedničkim lokacijama na graničnim prijelazima o zoni zajedničke lokacije na graničnom prijelazu Bosanska-Srpska Kostajnica – Hrvatska Kostajnica.

Nije bilo rasprave o ovoj tački dnevnog reda. S 28 glasova «za» i tri «uzdržana», data je saglasnost za ratifikaciju svih akata iz ove tačke.

Ad. – 17: Imenovanja i razrješenja članova komisija Doma

U okviru ove tačke izvršena su imenovanja i razrješenja članova pojedinih komisija kako slijedi:

- **Ivo Miro Jović** razriješen je dužnosti člana Ustavno-pravne komisije i Administrativne komisije Predstavničkog doma zbog prelaska na drugu dužnost;
- **Ruža Sopta** razriješena je dužnosti člana Komisije za ljudska prava, imigraciju, izbjeglice i azil Predstavničkog doma zbog izbora za člana druge komisije;
- **Filip Andrić** razriješen je dužnosti člana Komisije za vanjsku trgovinu i carine Predstavničkog doma zbog izbora za člana druge komisije;
- **Nikola Špirić** razriješen je dužnosti člana Administrativne komisije Predstavničkog doma, na lični zahtjev;
- **Ruža Sopta** izabrana je za člana Administrativne komisije Predstavničkog doma, umjesto Ive Mire Jovića;
- **Filip Andrić** izabran je za člana Ustavno-pravne komisije Predstavničkog doma, umjesto Ive Mire Jovića.
- **Vlatka Komšić** izabrana je za člana:
 - a) Komisije za ljudska prava, imigraciju, izbjeglice i azil, umjesto Ruže Sopte i
 - b) Komisije za ravnopravnost spolova, umjesto Ive Lozančića;
- **Ivo Lozančić** izabran je za člana Komisije za vanjsku trgovinu i carine Predstavničkog doma, umjesto Filipa Andrića.

Ad. – 18: Prijedlog zaključka o proceduri za imenovanje tri člana Izborne komisije BiH

U uvodnim napomenama predsjedavajući Doma Šefik Džaferović ukratko je obrazložio razloge za donošenje ovog zaključka, uz ostalo naglasivši, da dvojici članova Izborne komisije BiH, koji su stranci, ističe mandat 30. juna i da bi do tada Dom trebao imenovati nova tri člana iz reda tri konstitutivna naroda, kako bi Izborna komisija BiH mogla raditi punim kapacitetom. Kako je neophodno provesti javni konkurs, trebalo je propisati skraćene procedure i izvršiti izbor kandidata do kraja ovog mjeseca, rekao je između ostalog, predsjedavajući Šefik Džaferović.

O prijedloga zaključka nije bilo rasprave.

S 29 glasova «za» i jednim «uzdržan» zaključak je usvojen.

Predsjedavajući Ad hoc komisije Vinko Zorić obavijestio je Dom da je ta komisija danas održala sjednicu i da će konkurs biti objavljen prekosutra, a bit će otvoren osam dana.

Predsjedavajući Doma zahvalio se Vinku Zoriću na ovoj informaciji i zaključio 58. sjednicu.

Sjednica je završena u 18,15 sati.

Sastavni dio Zapisnika je taranskript sjednice.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Šefik Džaferović

